

## «Via XX Settembre» – en bleras citads talianas

Regorda a la data da la reuniun naziunala avant 150 onns

DA GIUSEP CAPAUL/FMR

■ **En prest tuttas citads da l'Italia exista ina «Via XX Settembre». Ditg è quai stà en l'Italia il Di naziunal. Ils 20 da settember 1870, pia avant 150 onns, avevan las truppas dal retg talian sajetà sin ils mirs da la citad da Roma sper la Porta Pia ed eran penetradas enturn las 9 uras tras ina rusna vers il Dom da s. Peder.** Igl ha dà chanunadas e schizunt morts. Suenten paucas uras ha il Papa (Pius IX) capitulà ed era daventà praschunier en ina citad che n'al s'udeva betg pli. Il stadi da la Baseligia aveva chalà d'exister. La pussonza seculara da la Baseligia na devi betg pli. L'unitad da l'Italia era cumpletta e Roma daventada la chapitala.

Davent da 1895 era il di dals 20 da settember daventà il Di naziunal en l'Italia per regurdar a l'unificaziun dal pajais. Quella reuniun territoriala ha dentant separà fitg e procurà per grondas tensiuns tranter ils laicists ed ils adherents dal Papa.

Per lezs era la Festa naziunala plitost in di da malencurada, tant pli ch'il Papa aveva scumandà a ses fidaivels da far part da la vita publica naziunala.

1929 – sut il duce Benito Mussolini – è la «Dumonda romana» tranter il Papa Pius XI ed il stadi faschistic talian – vegnida schliada. Tras l'uschenumnà «Patg dal Lateran» ha la Sontga Sedia reconuschì il reginavel talian cun Roma sco chapitala. Persuenter ha il Papa survegnì il «Stato della Città del Vaticano» cun anc insaquantas exclavas a Roma (las Basilicas dil Lateran, da S. Maria Maggiore e s. Paolo fuori le mura) ed era la residenza da stad dil Papa a Castelgandolfo sco ses agen territori e stadi. Sco recumpensaziun per l'antierui stadi da la Baseligia ha il Papa retschavì ina tscherta summa dad accumulament.

1930 è la data dals 20 da settember vegnida dismessa sco di da la Festa naziunala. Oz èsi aunc sulet la «Via XX Settembre» che regorda a l'uniun da l'Italia ed a la fin dal stadi papal 1870. Igl ha bain adina puspè dà emprovas da fixar danovamain il Di da la festa naziunala sin ils 20 da settember, ma senza success. Dapi 1946 commemorescha l'Italia il Di naziunal mintgamai ils 2 da zercladur. El regorda a la fundaziun dalla republica taliana ed a la dismessa da la monarchia l'onn suenter la Segunda Guerra mundiala.